

OHR i CAFAO formiraju savez za borbu protiv utaje poreza na promet i pranja novac

Visoki predstavnik, Paddy Ashdown, je danas u svom obraćanju novinarima u Sarajevu rekao da su utaja poreza na promet i pranje novca u Bosni i Hercegovini dosegli "ogromne razmjere". Visoki predstavnik je govorio na konferenciji za novinare o utaji poreza na promet koju je održao direktor Ureda Evropske unije za carinsku i fiskalnu pomoć (CAFAO), Allan Jensen. Visoki predstavnik je rekao da će OHR zajedno sa CAFAO-om i drugim organizacijama osnovati savez za borbu protiv utaje poreza na promet.

"OHR i IJC će putem svojih Odjela za istragu ispitati uslove pod kojim se registrišu fantomske firme koje kriminalci koriste kao najčešće sredstvo za utaju poreza i pranje novca, rekao je visoki predstavnik. Ovim putem će se utvrditi da li sudovi poštuju zakonske obaveze. Ukoliko se utvrdi da nisu ispoštovali zakone poduzet će se odgovarajuće disciplinske mjere protiv svakog sudije koji je odgovoran za ovakvo nepropisno registriranje firmi. "

"Kriminalni elementi su preuzeli kontrolu nad slabim sistemom registriranja firmi i rascjepkanim poreskim sistemom koji nadziru tri poreska organa vlasti" rekao je visoki predstavnik i pri tome napomenuo da je obim utaja "nevjerovatan".

Imajte na umu ovaj poreski sistem kada vidite nastavnike koji nisu primili plate, oronule škole, učenike bez udžbenika, bolnice koje su prljave i slabo opremljene, ljekare koji su slabo plaćeni i medicinske sestre koje su na kraju snaga jer jedva sastavljaju kraj s krajem. Za to je kriv ovaj sistem. Sarađivat ćemo sa novim organima vlasti da bismo promijenili sistem koji je očigledno neispravan i reorganizirali ga" rekao

je visoki predstavnik.

“Moramo zamijeniti poreski sistem koji omogućava ovakve utaje, a dio rješenja je u uvođenju PDV-a umjesto poreza na promet” rekao je visoki predstavnik.

Prema procjenama, građani ove zemlje su putem utaje poreza na promet od početka prošle godine izgubili najmanje 500 miliona KM, a sredstva koja su izgubljena putem pranja novca u sličnim aktivnostima odnosno putem fantomskih preduzeća i poslušnih bankarskih službenika vjerovatno dosežu iznos od oko 3 milijarde KM svake godine.

“Jasno je da kriminalci zloupotrebljavaju slabosti poreskog sistema koji omogućava trgovinu bez plaćanja poreza putem lanca prodaje koji se sastoji od uvoznika/proizvođača, prodavača na veliko i prodavača na malo” rekao je gospodin Jensen. “Prodavač mora platiti porez tek kada robu proda kupcima. Istragom je ustanovljeno, na osnovu faktura, da veliki broj prodavača na veliko kojima su uvoznici i proizvođači u BiH prodali svoje robe zapravo čine fantomske firme koje ne postoje iako su registrirane na sudovima i imaju vlastite bankovne račune. To znači da kada predstavnici Poreske uprave dođu na određenu adresu kako bi izvršili poresku inspekciju na toj adresi ne nađu preduzeće kao ni robu koja je navodno prodana fantomskom prodavaču na veliko. Tako te robe mogu slobodno biti distribuirane na crnom tržištu.”

Visoki predstavnik je napomenuo da je postojeći dvostruki sistem poreza na promet “u potpunosti diskreditiran te da je postao rasadnik kriminala.” Ovakav sistem ima za posljedicu situaciju u kojoj stotine miliona KM koji bi trebali biti korišteni za isplatu penzija, školstva i bolnica završavaju u rukama kriminalaca. “Moramo se udružiti sa sudskim organima, vodećim bankama i poreskim upravama kako bismo uništili ovakav sistem”, rekao je visoki predstavnik. “Moramo da rješavamo problem nezakonitosti, pratimo protok novčanih sredstava i prisilimo osobe koje se koriste fantomskim firmama da plate

poreze. Moramo identificirati one koji su inicijatori ove pojave i koji su se izuzetno obogatili pljačkom običnih građana, odnosno one koji stoje iza ovakvih fantomskih firmi.”